

意苕山館詩稿

意菴山館詩稿卷十五

元和陸 嵩希孫著 男懋修九芝校

丁巳

新年招諸弟姪小飲

年年總說補蹉跎又入新春喚奈何室有舊醅聊共倒市
無兼味且相過自經憂患餘歡少各話家常老淚多差喜
阿咸詞筆好家聲還望振巖阿

時辰生姪
試列高等

讀醫書口占

醫國何人是上工瘡痍滿眼望羣公近來不用閒詞賦卻
恨靈樞讀未終

辛豐撫卹局示楊子城

遭難悲諸生流離慘鵲結楊生獨慨然設局事撫卹勸捐
欲何人各自私家室但餘公車資官侵未什一幸免養兵
用差可局中撥人給二千錢事已兩閱月奈何孽孽徒競
端起錐末禮讓竟罔知聚羣務攘奪郡伯頗畏難欲余共
稽覈持籌余豈諳謝免更憂結濟人但乘興溱洧得盡悅
孟言良可思古今事不易若欲平瘡痍終必干戈徹急散
無用兵毋使脂膏竭恆業得各安饔飧或無缺庶幾廉恥
心平旦漸萌孽乾坤有傾洞日月終光烈倒縣望急解誰
與此秉鉞我言猶未終楊生涕擦擗試聽鼙鼓聲依然震
城闕

示諸同學

多謝諸同學爭來看老夫流離休更說涕淚已全枯疏水
能供否衣冠欲廢無莫嫌相見少十里卽長途

京峴山

京峴山頭望夕暉幾家門戶未全非衣冠優孟場空設富
貴南柯夢豈違頒歷居然王氏效習儀還欲漢官依如何
簾幕深垂處不見從前燕子飛

旅館苦雨

我來無日不風雨春已欲分寒尙拒到眼誰曾見一花關
心只是無乾土去年苦旱今苦澇天意何爲未忘怒經過
市頭不敢問米價又知增幾許漫天烽火看依然水有蛟
龍陸有虎拔劍一歌行路難此夜驚魂落何所

諫壁喜見嚴子秋

意外得相見離情且莫說問君去年秋圍城事顛末君言
賊來時守城但羸卒居民雜其閒操戈膽驚裂相持竟兩
旬未分死何日詭計擅賊中隧道慣潛掘忽聞城欲傾礮
響震不絕時方大旱憂城中水將竭暴雨從何來火攻計
頓屈詰朝蚩尤旗倒捲看倏忽萬姓皆歡騰神佑荷倉猝
守土彼何人天功乃貪竊得毋衾影慙豈真水火出君雖
標掠遭幸未性命失願得故里歸備書董狐筆紀時正咸
豐丙辰秋七月

過江赴寶晉洲作示諸父老

寶晉我屢游此來奉府檄非是征官租祇各按農籍勸分

倉箱餘稍助諸生食心知兵戎遭此亦非樂國 皇恩久
蠲除爾當知感激多士皆國楨飢寒累 聖德仰體 宵
旰憂卽具擊壤識畝分二百錢毋過斗米值請觀城市閒
殺人正朝夕免死哭道旁忍餓少餘粒父老厚愛我聽我
語悱惻定知感心生徧喻無吝嗇

聞客言金陵未陷時有牛頭馬尾之謠因有感於昨
冬事補成一詩

金陵城頭旗不紅金陵城外無賊蹤大營將士枕戈卧居
民傳報門誰通紅頭兒郎自殘殺流血滿溢秦淮東韋楊
兩逆盡輟裂但一石達開稱雄樓船若使遇王濬乘亂定
急孤城攻不然燕子飛不到烈火胡忽焚宮中此是咸豐

六年事月正紀戊時方冬龍旗天策有占驗妖氛應早銷
洪濛何意春來斷消息不遺一矢交一鋒豈必牛頭接馬
尾始見赤日行當空只恐養癰患愈大平臺授鉞恩徒
隆有明張李足殷監誰能一將看成功

洲民有頌余勘災時事者作此誌愧

勘災會記此盤桓自笑儒生一味酸鯨鱷風濤驚乍見鵠
鳩面目忍親看繪圖造冊聊煩我輸粟分錢總費官慙愧
有人提往事殷勤還與勸加餐

酬王志遠

朝棟

兼示令弟芾卿

正是雲翻雨覆辰逢君兄弟一相親名雖久識交偏淡俗
自能殊語便真客有蘇張愁拔劍世無沮溺悔知津武陵

莫被漁家誤此卽桃源洞裏人

懷曹少雲

爾庚

相逢多舊侶只是少曹三歲月頻憂誤音書亦費探星辰
仍極北烽火尙江南尊酒論文地思量總不堪

別劉伯純又三年矣恩恩未得往訪寄此奉懷

浮雲漾晴空閒閒自來去狂風忽吹之一散不復聚自我
與君別歲月亦屢除相思非無夢旣寤了無據虎豹游交
衢蛟螭戲當路寸鐵手不持誰能冒險赴茲來正好春陽
和喜微布門前棠棣花翻反怨復慕知君意惓惓念我非
朝暮覩此離別情胡能不君訴催迫苦無端又乖此良晤
愧感復何言愁更指前渡

舟行躁熱到家寒甚

江頭烈烈吹南風清明已似六月中到家風忽轉西北嚴
寒又復如窮冬陰陽乖舛乃若此和氣那得回從容兵戎
降罰豈未厭更作癘疫災民躬流離滿眼看不得哀哀還
望彼蒼穹

曹二香往返金沙贈詩爲勞

往返甫一旬毋乃太僕僕君去知何遽歸又何太速牆屋
既毀傷愛豈尙薪木獨行金沙城遇雨自躑躅誓墓願莫
償挽車夢徒卜旄頭落何時圍棋局誰覆孔融世久無王
晞思爛熟後會悲茫茫相送盡一哭

聞餘杭民變憶董氏妹

聞道餘杭縣窮黎又盜兵定知乘世亂豈得爲官清消息
傳非誤倉皇幸卽平獨憐鮑家妹那免替兄驚

京口解鐵如

爲幹

以劉伯純書來見時偕友游西湖

歸索贈句

君家住葛村幸與城市遠會當兵戎興得免傷流轉豈非
先澤長餘慶在積善劉生今端人取友自侃侃書來通姓
名諒非時賢算知君嗜清游自結西湖伴扁舟繫門前落
日樹頭滿追陪恨未能深情負繾綣歸持一束詩韻長節
欲短方今冠蓋徒趨慕但禁嚮誰知菰韭閒滋味別盤盂
爲問孤山梅肯共垂楊綰林逋去千年相悲世知罕我恨
憂患罹炊煙正時斷難爲雞黍留祇與供茶笋君祖濟時

才不遇世同惋所留古文詞姑留卷徐展稍撲胷中塵庶
免前賢莞君歸語劉生定知我非緩送君去掩關臨風自
憤懣

聞溧水寇退書感

昨日相逢溧水客爲言溧水已無賊賊非畏兵乃畏蝗蝗
食麥盡賊無食賊退已遠官兵追官兵自怒無功同道逢
窮黎肆殘殺報功論級爭喧虺嗚呼民命慘若此遇賊亦
死兵亦死然乎不然我得知但聽客言淚如水

書蕭何世家後

蕭何本自刀筆起功成乃欲伊呂比但道能識韓淮陰楚
漢興亡決於此同時非無彭與黥至如信者真國士登壇

受拜禮何崇一軍皆驚敢仰視知人能用真相才垓下悲
歌竟此始不然頗牧居偏裨馬革徒拌亦可恥千秋得失
將毋同並將無功欲誰恃若論英雄報國心請看青青漢
家史

閒居感興

銀潢望斷幾曾傾弧矢終宵不肯明書上萬言餘涕淚劍
摩三尺想從橫恩恩攬轡人誰識草草埋輪客暗驚若果
淋漓忠義曉投戈何必不連城

甚毋高論且卑之漢代君臣語可思市義能知真上客好
名不諱卽吾師寶刀駿馬難留日薏苡胡椒競載時俯仰
千秋同一感流民圖繪幾人知

烽火仍看急建康
輝煌甲第正金昌
本無後樂先憂志
大有沾寒鬻暑方
貴曰魚鹽名獨擅
賤時齏菜味知忘
驚心擊柝聲高處
歌舞場原接戰場

政府何人一疏推
能知桑卜果奇才
場園自信狼肩盡
臺築虛傳駿骨來
郡國緡錢愁共匿
海山官稅痛分開
頌蕉彈竹紛紛說
留共韓陵片石哀

當十錢歌

軍興改鑄當十錢
重十二銖厚且堅
十錢當百千錢萬
出入市井人皆便
是何爐頭善圖利
賄通官府施神姦
鉛砂相雜務輕薄
彷彿驚眼無中邊
因之市物盡昂貴
閭閻困苦知難言
司農仰屋少良策
鐵錢鈔幣紛頒宣
有司奉行

弊百出貽害卹顧民顛連我朝錢法盛康雍美好不數開
元年奈何毀銷任姦僧改造器皿空藏緡當事何人國寶
惜哀哀何獨民膏腴

長歌行

我生志豈在巖谷常念功名建白屋年過四十不稱意救
飢且復就微祿何意遭逢此寇戎兼看誅求急當局流離
遷徙五六年皮骨空存卹有肉親朋久疏少枉書同族凋
零盡一哭往來僕僕還江頭得避雨風雪霜酷相催老病
誰我憐忍顧妻孥不飽腹高車駟馬看紛馳出入黃金載
滿橐道旁嘖嘖盡稱羨誰更寒儒屑瞻矚夜深獨與古人
語不惜展書費燈燭

句容收復後作

五月復溧水六月收句容捷書報先後寇退知誰功聞信
雜驚喜探問勞郵筒豈真富兵甲無負小范曾浮雲正莽
莽江濤方洶洶深慮金焦閒鉤結仍姦兇不然武昌火何
以更番紅賊去急熱營賊來爭然烽暑寒已五易杼柚悲
成空迂儒昧時務稱功恥雷同君看此流寓藜藿皆不充
相逢話鄉里涕淚知何從官軍肆焚掠道路無行蹤歸去
死愈速呼籲徒蒼穹所望諸將帥號令申和衷肅清江南
北露布騰西風下以蘇萬民上以報九重

泊望亭驛

五里一卡十里柵禁完詰姦有名籍閒員游客爭驚趨誰

見紅頭此擒獲打鼓插旗暮復朝抽稅喧譁苦行客傳聞
彈劾悉罷去窮民手舞應加額我行經過看依然停泊先
愁望亭驛

和嚴子秋六十初度自述詩次韻

不信乾坤自轉旋茫茫何處問青天蟲沙猿鶴悲今日瓶
盞琴書憶往年舊雨遠望成斷梗好風吹送忽華牋驚心
甲子從頭數那弗低徊爲慨然

送盡華年思不禁長吟莫怪帶商音風雲色黯迷城郭聲
鼓聲喧變瑟琴筋力漸疲筇短短須髯虛負戟森森流離
遷徙終何定此感原知一樣深

推襟曾託舊皇州卅載懽情付水流肘繫寸銅拋未許腰

縣一劍恨難酬相思夢遠還愁寄好語腸枯也費搜手把
君詩夜深讀一回翦燭一搔頭

誰識綢繆未雨營知君近亦諱談兵憂時早悟權非屬紆
難先驚室已傾身世百年原逆旅家園萬里只重城何當
天與銷鋒鏑柑酒歸尋谷口鶯

一官早羨乞閒身遺愛甘棠話尙頻會聽弦歌還舊俗便

鎔刀劍入陶鈞

君幸嘉祥爲古武城地今成蒞藪

心存濟世非求達祿借

娛親豈爲貧今日全家正好在底須相對更相顰

況甘冷宦是初衷投老還思此席終

君歷秉江陰青浦桃鐸今欲仍改教職

李春陰隨處好蒔鱸秋興幾人同前游歷數時偏換往夢
重尋迹未空只恐石門賢吏笑近來吾道亦終窮

驅馳我亦歎勞生祇是難忘舊日盟可但追思成獨感每
於不語見深情牛車軼軼身何託棋局從橫眼自明賸有
憫時元結意春陵吟罷欲誰賡

招隱何須定澗阿時平到處足婆娑路無荆棘行知易室
有芝蘭樂況多三里待銷天外霧一甌且遣睡中魔明年
補獻南山頌容我階前倒綠蓑

卽事成詠

昔是窮王粲今爲老鄭虔依人原失計薄宦最堪憐鳥倦
還愁弋魚勞更怕筌紛紛求試客詞賦欲誰賢

時議補行
府縣試不

合而
罷

舟感

嗚咽江頭水亂流夜深蛩語更啾啾不因羈客偏多感祇
恨西風慣送愁

呂城道中見飛蝗

我不知飲愁難破推蓬且向船頭坐忽見飛蝗欲蔽天呂
城東去奔牛過春來遺種心早驚自經霖雨無留形如何
天災又此降田禾食盡悲蒼生吁嗟乎田禾食盡悲蒼生
但願不到蘇州城

歸後寄楊子城

東風楊柳正依依又見梧桐葉亂飛自笑此身真燕雁春
來秋往總無違

陸居無屋水無舟前輩風流此未愁祇恐笑人逢趙壹囊

中併少一錢留

縱教牛炙能貽我未免猪肝欲累人往返恩恩無十日近
來管叔自嫌貧

書來不惜語周詳一日三秋總未忘到得相逢無一事此
行直爲看飛蝗

悼陳明皆

華閥陋蓬蓽營營各生存一朝畢人事貴賤何繇分哀哉
陳明皆本是草野民念從避寇亂我居與比鄰忠義偶感
激肝膽傾輪囷自謂耕鑿侶何莫非王臣奔走徧阡陌不
卹兩足駮義旗一以舉響應爭紛紛豈意味時局觸忤遭
官軍糧鉏急投棄禍幾嬰其身嗟嗟閱五載殲寇誰知聞

聞君日慟哭憂憤終難伸一病竟顛殞浩氣還乾坤願盼
自雄偉軒冕彼何人千秋萬歲後畢竟知誰尊我欲爲君
告何處招君魂

顛聞

鎮江城中人食人鎮江城外皆官軍頗聞降人日夜出便
道指顧清風塵豈意兩月尙寂寂城頭未見空妖氛昨者
有客自西至爲言高資賊彌熾上游充斥勢莫當那得虎
狼竟就斃戔戔巨艇況江心來往何難寇糧致何人高坐
中書堂安危乃聽彼蒼蒼我兵餉盡儻一日此憂非細誰
知防

示潤孫

汝父遭喪亂隨我東西走致令汝失學此豈獨汝咎憶汝
稚齒時應口四聲剖冀能傳我詩得比驥子否今汝如父
長所學轉人後雖居顛沛中我失循循誘立志果克專汝
衷豈難牖聖賢任人爲富貴本何有我老尙孜孜汝少可
稍苟泛驚慎自戒名實庶無負

述悲

鎮江雖陷賊元氣謂未傷誰與作此語我聞淚浪浪毋怪
攘利徒蹈死如尋常牽牛過轂鯨不忍猶廟堂橫尸況滿
眼膜視乃袞裳心但計豐厚胷豈閔喪亡夜氣一以沒禍
亂知何央斯民何罪辜得問彼蒼蒼

送兒懋之松陵慨然書此

韓康昔賣藥舉世少人識況乃喪亂逢隱此計良得苟存
濟物心豈必羨袞烏遠祖思忠宣相業著唐策亦嘗譏良
方蘇沈各取擇彼皆古大賢務此乃亟亟所嗟市僧流但
計錙銖獲靈素略未窺處方恣胷臆民命視土芥何異彼
殘賊汝當惻惻念慎毋物我隔虛衷師古人學問庶日益
衣食既可資天札憾自釋不然疾苦貽夜夢得安適瘡痍
痛滿前巍巍想秉鉞

誦杜詩有感

世亂方交困年荒更莫支求全庸有術遠禍亦徒思斷尾
雞難免焚身象豈知衣冠兼盜賊愁誦杜陵詩

憶昔行自題存稿後

憶昔隨親走大梁問年十五時正當論詩習聽諸老蒼便
思上下漢魏唐心怪杜陵老胡獨語變商老親怒我妄雌
黃爲語開寶分興亡始知詩境原無常豈意行年五十過
兩遭喪亂髮盡皤妻子流離顧不得羝羊觸藩豕涉波出
入軍壘冒兵戈正如江頭慟哭日焉得歡笑傳詩歌悲哉
親沒逾卅載誰見詩名滿人海但編舊稿紀歲時回首平
生淚空灑

我生之初行

我生之初乾嘉間時清俗美多豐年家家蓋藏有餘粟斗
米二百青銅錢似聞父老尙喈喈豐樂已遜康熙前爾時
正供早完納軍船開兌無遷延有司豈盡免加耗論石未

見錢盈千後來橫征漸無已倍額不足知何言致令終身
苦樂歲相慰反幸家無田況今寇戎逼朝夕旱蝗復見凶
荒連奈何追呼肆胥役肥橐不恤窮民腹大戶小戶盡流
血哀哀八口誰能全聖人高拱那得識上告終必朝官
賢小臣微賤復何道仰瞻北斗空涕漣

秋夜讀蘇詩

空庭葉落風颼颼秋聲入耳愁復愁閉門獨坐少人語一
編尙幸蘇詩留我思公生正全盛濟濟盈廷方衆正曷爲
憤激傳詩歌謗怨頻興至紹聖忽念江頭老杜陵更思幕
下玉溪生側身兵戈口讒忌得勿血淚枯腸傾時宜不合
祇自苦僂耳歸來已泉上買田陽羨徒空言留得詩名自

千古儻教此日公尙存不知出處誰同論自來賢豪世難識掩卷何處招公魂

避難遷流典質已盡不得已出宋遼金元四史鬻錢易米作此以曉潤孫并以解嘲

晨起檢空箱典質已敝溫朝餐尙無米親知欲誰問搜羅架上書四史牘亦僅眼昏不能讀蠹魚積盈寸不如姑鬻之聊以救窮困得失皆自我相棄又奚恨稚孫手撫摩未免色餘吝強顏爲曉喻博覽每遺近一經苟能通百城擁豈遜兵戎息無時歲沉值饑饉守此知良難聚散數安論出門心盡然默自淚微隕

舟中小至

小至又明日何時得暫休風塵仍客路雨雪正扁舟被薄
眠難穩宵長夢益愁思量無限事細數五更頭

留宿嚴子秋諫壁旅寓

顧瞻蹙蹙豈交衢欲往何之祇自吁卻喜故人縣榻待不
教歧路泣楊朱

仲冬十有二日潤城餘逆與金山瓜州賊衆同竄金

陵張軍門

國樑

伏兵高資殲其大半喜甚作此以

紀其事

寶蓋山頭火燭天雲台摩笄光遙連耳聽礮聲震不絕城
頭亦復高騰煙須臾難民數千衆馘耳黥面紛來前始知
紅頭早相約銜枚疾走沿江邊金山瓜州兩巢穴指顧不

見森戈鋌傳聞中路遇伏發所過一夕胥誅虔我適驅車
赴橫牖聞信喜極還涕漣亟扶驚僕向高望一步一蹶忘
墮顛嗚呼濶城痛賊據五載空聞備攻具奪弧縣布誰先
登豈料今朝賊自去念從高資殉吉撫大營退向丹陽駐
倉皇戎馬百里閒尸積如陵血滿路蘇常得保良亦難鬼
哭神號那可訴敗殘收拾知何人獨賴張家一軍護旋乾
轉坤更此時號令森嚴預密布糧絕何須城亟攻險戾誰
能任飛渡龍潭以東竟肅清焉慮金陵久負固嗟嗟水火
斯民罹不死賊斧亦死飢張軍若早莅此土何至日久無
完黎奈何當事罔知卹搜括尙恐荒陬遺我雖流離自不
暇蒿目能弗悲瘡痍所望江南賊全掃四境不復騰鼓聲

恩膏大沛仰 聖德同幹元氣還純熙小臣得歸守蓬華
尚能作頌傳華夷

酬嚴子秋

暑寒嗟五易寇退始今朝何幸餘生在兼承好友招相看
那勿喜卻顧轉無聊出處愁重計豪情已久消

大港遇同學諸子述感

久拌此別見無期何幸重逢轉各疑豈意避兵翻入幕更
無生計漫爲醫兒童漸長看難識廬舍全墟問莫知蹤迹
可堪同細訴淚零如雨欲承頤

旅夜

風急雲昏欲雪天荒祠枯坐夜如年憂來不斷憑誰訴夢

亦難歸祇自憐沙落幾曾留箭鏃鳥飛猶自畏弓弦茫茫
身世知何似輾轉思量耿不眠

劉伯純屬校近詩題此卽別

昨從寶晉洲歸投諫壁宿感君雞黍留客來真不速君素
嗜吟詠商略每我屬我豈能益君顛末笑操續殷殷乃深
宵不惜費燈燭譬如砥礪粗磨礪效精璞瑕去瑜自昭豈
謂石勝玉漢魏須力追唐後慎毋學此言非不然亦祇是
糟粕必欲窮其源要貴經史熟胷中多古人出語自超俗
詩況道性情君性本醇篤何難發歌詞聲律和清穆臨別
貢區區夜夢尙反覆

丁小坡以金壇守城功擢宰鄰水作此贈行

江南未休兵，芻蕘困供億。誅求尚縉錢，比戶痛告匱。水火
出何時，民怨甚盜賊。君抱恫瘝懷，覩此必心惻。今將謝
盤往宰川，北劇漫誇禦寇功。亟播鳴琴澤，近來少循吏。
非是紉才力，不恤閭閻窮。但徇吏胥刻，問絹風苟追。選錢
頌豈息，諒非不學徒。致此能旦夕，必若還太平。風動徧
郡國，同官近十年。迂愚久君識，妻子自難保。瘡痍乃莫
釋，寸私貢臨歧。千慮或一得，置酒臨前庭。雨雪動顏色，
望君美政傳。遠慰長相憶。

從錫山至澄江道中作

經旬兩度錫山過，草草勞人可奈何。舟小祇容踰足臥，
簾低不礙側頭哦。關心破屋居民少，冷眼高桅熟客多。
自笑

此來真底事豈忘世路尙風波

虞山酬顧厓方雲壑

世難遭未已百念歎消泯獨此求友心寤寐尙交引顧公
我舊知卅載別轉胸昨年鹿城東重逢感相憫同官得方
干高談恣滾滾真如對萱草不覺百憂損今來笑簡書雨
雪載田畛更感肴醴羅匪獨具蒲筍良會原大難翦燭此
宵盡所惜歲欲除歸計迫艱窘相約虞山遊期待春風準
望君吟詠間爲我賦招隱

紀湯培南事同周生

伯義作

湯培南湖南人本姓易氏名非真但稱湯四人知聞全家
陷賊恨且憤脫身無計悲污身幸來金山託心腹漸得賊

歡作賊目出入鎮江城京峴路習熟乘閒投誠奔大營自
贄妻子盡一哭反身率衆徑入城計賺火藥空賊局妄謂
須臾賊未覺豈知消息城中傳慘遭輾裂體不完攀援賊
黨死無數一死亦足明其冤吁嗟乎賊中豈少湯培南終
身作賊人誰甘何弗痛哭招撫徧示 皇恩覃

題變徵遺音後爲霞澤金夫人作

夫人名慧字靜因嘉善蔡佛華繼室也蔡宰湖北廣濟
縣粵寇至檄赴軍前屢著戰績旋遭賊害夫人在武昌
圍城中聞報慟哭欲殉以夫骨未卜爲恨姑留身待旣
而城陷竟以全家逸出匍匐道路尋遺骸不得則哀籲
賜卹有憫之者忠魂始慰而艱苦備嘗已三年矣會

其兄

其相

遣人相迎始得從干戈擾攘中挈子女以歸

歸後誓養姑事畢終以身殉語見哭夫詩中嗚呼其亦

可悲也已

鼙鼓聲喧簫管止一片宮商忽變徵哀吟激楚傳江頭巾
幘尋常那有此夫死沙場報國恩圍城日夜驚心魂兒嘯
女號顧不得一死夫骨知何存是時天地正昏黑驚雷震
動全城沒溝渠積血流潺湲道路橫尸枕狼籍咄哉萬死
身竟全遺骸匍匐尋誰邊淚盡血繼贖皮骨哀哀應荷彼
蒼憐忠魂得卹願已竭此生那望死同穴但求夫祚歸更
延事畢養姑誓不活嗚呼往事堪再論出生入死非一身
千秋何人比無愧流傳斷句同酸辛

意菴山館詩稿卷十五終

孫潤庠曾孫家振校字

意苕山館詩稿卷十六

元和陸 嵩希孫著 男懋修九芝校

戊午

人日赴潤城

人日揚帆一愴神
惻惻扶病太無因
到時祇恐仍如昨
盡日相逢無一人

潤城書感

客冬十一月寇退我入城
淒涼不可說觸目皆荒荆
尙餘數甲第敗壁無完櫺
今來見修葺斧削聲馮馮
詢知是官府公館爭各營
主人問何在漂泊方無停
暫歸省鄉里疑懼敢自呈
相逢偶我識欲訴先吞聲
我雖少棲託故里未

遭兵敝廬守先澤差可容婦嬰覩此默自慰焉用悲沾纓
烏知盜賊始不有難言情

余來無棲止所聊障席於西廡下以居愀然賦此
障席爲垣竹結門無分宵晝總昏昏得教風雨身聊蔽敢
望雲霄手更捫坐久須眉方略識難中言語易知溫請看
舊日人何處近聖人居已獨尊

善後局

官設善後局勸捐召富戶富戶存者幾半已變窮苦雖有
遠宦人家亦罄阿堵訴官官不膺但慮捐輸阻竟欲提押
來下與逋逃伍嚴令奉上司疇敢一言忤念彼水火罹不
絕命如縲誠抱惻癘懷召之復故土善後雖多端舍此更

安數尙恐溝壑餘來者十無五堪更迫脅之裹足畏如虎
邱墓不敢戀遑暇計安處衛文昔遷國遺民痛急撫生聚
繼教誨豈苟罅漏補守令誠能賢何必今異古奈何別派
官聚謀費資斧月支逾萬錢徒令怨成府試讀元結疏臨
風一長撫

金沙送郡試泊雲陽作

朝來隨郡伯一櫂下丹陽水順風偏逆舟遲路覺長吏迎
爭驛堠兵雜尙橋梁待試人知久歡聲暫道旁

秣陵關

潤城寇退踰三月金陵糧盡復爭說按兵不動知何爲徧
掘濠溝使援絕心知賊勢亦已窮堅守孤城不敢出秣陵

雄關峙郭南環攻未許宵潛奪昨聞虎將此殞軀謂虎總鎮坤元
未免長城痛先失何意今朝捷報馳大營已向鍾山逼釜
底游魂定幾時水火斯民望早脫祇恐傳聞或未真夜卧
仍勞夢顛越

郡試畢後欲之潤城不得乞假旋里作寓拏金沙計
慨賦一詩

官鼓聽初歇進退仍維谷念當還潤城傾隕幾聞屋焉能
擔筐篋全家此託足諸生況各散誰更問講幄際茲困窮
中妻孥卽僮僕分炊力所難顧瞻兩躋跼姑歸挈家來暫
待過三伏雖非久長計或免缺餽粥近來司鐸官往往自
污辱趨承類雜流動輒受繫縛今幸太守賢容此迂儒瀆

投詩我竟行翩然笑黃鵠

沈玉生欲就官赴浙詩以諷之

玉生負賢名禮延久幕府自遭喪亂來流離少安處依人
總不聊進退兩無主幻想就卑官不暇避衆侮語我頗顏
慙歎息膺頻拊念從禮教衰競心召于櫓廉恥苟稍知動
輒與世忤太平覩無期居今敢稽古我方愚去官君往欲
何所惻惻動離懷雨風雜鉦鼓

金沙寓館酬酢紛煩思往事懷舊人悄然不怡援筆

屬句情見乎詞

往迹無端復此尋懷人感事總傷心偶同言笑都成古縱
別酸醎已異今世亂衣冠輕右族道衰鐘鼓廢元音滔滔

斯世吾誰與沮溺空勞恨不禁

丹陽舟中苦熱不寐書此以寄兒懋

烈烈催南風炎暑日以熾側身徑赴官亦自知非計遣兒
送母歸此豈我初意牆屋奈傾隤薪木失蔭芘家具雖無
多安置少隙地分權金繩江東西遂迢遞未免動離懷惻
惻暗隕涕我今泊雲陽兒過毘陵未揮扇汗四流蟲嚙苦
難避枕席貼若蒸肌膚垢增膩推蓬看繁星燦燦列天際
樹頭靜不搖萬里絕纖翳驕陽想明朝逼人當加厲深憂
衰病軀路隔定兩繫我豈尙熱中造物故相戲夜半聽舟
人婦子語瑣細益知在家樂飲水有餘味襦襪徒笑人反
屑免交議風波念未靖腐儒本共棄歸期敢更愆毋再冬

衣寄

潤城官廨盡燬惟學舍尙在嚴子秋言於當事先爲
修葺工竣書來招之入城居定後賦此奉謝

潤城官廨無一存我居獨未遭賊焚修我牆屋我將反今
豈遂無武城人深感故人替籌畫官爲補葺居然新金沙
試事正初畢襪被竟入身忘賓檐前燕子尙我識飛飛不
避庸無因此堂雖非舊王謝髣髴故主歸同親出門四望
轉怊悵刺眼瓦礫居無鄰諸生流離問何處思之不見徒
酸辛堂西數椽我手闢經營辛苦逾冬春卽吾廬額識安
在遭賊定早摧爲薪人生往事類如夢我況頻歲遭遘迤
其閒得喪那可說莊生齊物誰重論獨嗟金陵寇未滅驚

心擊析聲相聞我雖居此得毋懼秋風準擬尋鱸莼

酷熱喜雨

炎暑苦蒸逼草木皆枯焦老夫夜數起揮汗如流膠蚊蠅
復交聚肆虐憎肌毫安得火雲散掃蕩來金飈一雨忽亭
午頓覺襟塵銷盛衰有起復天意誠昭昭自笑惡炎熱真
欲性命逃今夜定安寢得免更叫號雨過步庭宇散髮堪
逍遙何當西風催送我歸衡茅

署齋感興

廿載還留未了緣重來風景一愀然舊時莫問南州榻此
日空尋子敬甕祇有荒蕪堪伏兔更無高樹不聞蟬鳳麟
兩石猶嵌壁贏得摩挲拓本傳

雉堞仍看當外屏夜深戍鼓枕邊聽荒涼廢圃叢生莧寂
寞空庭冷墮螢修竹幾時成翦伐垂楊無主自飄零光風
霽月依然好不見崔巍舊日亭

也曾抱策獻當途喋喋何能效嗇夫世變功名歸里巷道
衰禮樂賤師儒斷槍折戟隨淪沒廢鼎殘鐘問有無到處
遷流成語識悔題楹額卽吾廬

回首平生祇自哀可堪兩度避兵來漫勞笨攜家具并
少殘編問劫灰苦雨客愁仍不斷西風歸夢已頻催王公
早逝崔公去

謂王大令德茂
崔太守光笏

誰更延賓座許陪

見墮蟬

一枝何處託飛墮忽空坪此豈草間物能爲唧唧鳴

耳聾

久已風塵厭何妨耳漸聾
語言容獨少趨走笑難工
衣溼知逢雨旌揚覺起風
亂蟬應我識不噪夕陽紅

津門歎

江南莽莽猶風塵夷氛又報騰
津門船堅礮利久傳說驅
勦何敢輕揮軍所求毋乃太辱國
主議仍是前疆臣紛紛
廷爭動一黼座得予自盡猶全恩
所嗟中華尙禮域已悲
荼毒遭黃巾堪更近畿許
通市衣冠錯雜且休論
百貨交易務淫巧錢刀習較忘
尊親勢將盡驅入禽獸誰教稼穡
明人倫嗚呼先聖去今遠
大道豈得常澌淪貞元自古有
起復數窮必變終乾坤
請看前明盛倭寇橫行豈必真無

因不然重洋數萬里焉敢深入輕其身

感念路質軒不置寄其令子才甫

兆蓉

茂才

終日少人過枯坐生煩憂慨然念前哲逝者不可留路公
負雅望淵量傾名流過從幸朝夕馨襲餘金襴如何未三
載一別成千秋世風歎日下大雅輕溝猶誰能強趨逐氣
味忘薰蕕追思君歸時恨不從君游獨行今遇雨踟躕悲
江頭君沒子尙少得免飢寒不道遠但呼負問訊稽重郵
昨聞半衿掇失喜知何由更望致遠大努力崇姱修需賢
正時亟先志期重酬

尋丹徒學廢址追悼程曉楓

程子談經處重尋一慨然草深迷曲徑井廢失神泉

舊有劉宋

時井遇
旱不竭
懷絕山陽笛
悲空子敬絃
近來司鐸者
誰得似君賢

過望兒橋愀然生感

獨客真無賴
歸期苦尙遙
西風生昨夜
愁上望兒橋

得內子病起後書卻寄

愁中百病易相欺
苦熱舟行本不宜
恨我遠難親問藥
幸兒今亦漸知醫
就衰筋骨原時痛
遭亂形神況久疲
莫更傷離損眠食
凋零門戶要卿持

野莧

雨過尋舊圃
嘉蔬復何有
舉目但野莧
叢生徧牆後
刺滿不可觸
觸卽傷人手
深恐勢蔓延
塞路斷岡阜
粗僕不曉

事攜鎌喚園叟便思盡芟之更種菰與韭嗟嗟雨露蒙得
地彼亦久此類沉衆多荆棘互蟠糾翦除知良難消長本
非偶不如避此歸寂寞自戶牖

出門

晨起攬衣裳出門欲何適徘徊大道旁默數往來客紛紛
盛車騎攘攘逐酒食曾有幾閒人經過話今昔西瞻金焦
勝北望甘露迹荒涼知何言風雲已變色破屋知誰家一
犬卧牆側見我尾欲搖有若我曾識山空屐齒無古道問
豈得扶杖徑獨歸掩關自歎息

書虞山陳于鳳

鄒

錢箋杜詩批本後

在昔杜陵老生值天寶時許身比契稷不得壽舜知賊庭

一朝陷勸哭摧肝脾閒道走靈武性命懸如絲感激備袞
職諫諍忘其私華州一貶謫妻子悲此離轉徙歷秦蜀肉
脫空存皮兵戎迄未息京闕瞻無期民命問誰卹四野多
瘡痍平生致澤心寤寐徒涕洟詩歌寓憤惋浩氣干雲霓
稱爲一代史知者誠無譏追思獻賦日名譽通綸扉謂可
志略酬勲業垂常旂豈意亂遽作烽火連郊圻終身在憂
患得免時悲悽詩本性情出學詩宜公師注家數十輩誰
實窺其微我讀陳韶本恍來浣花谿惻惻雨風夜哀哀危
苦詞

寂寞

寂寞如僧舍青山半面遮繞牆惟白菟傍屋少紅花斷鑿

棲荒礪殘碑卧冷沙興亡誰共話輾轉自悲嗟

寫懷示懋兒

俯仰觀禽魚飛潛各有性誰始制網羅吾欲咎前聖紛紛
利祿營動足皆陷阱軍興盛捐輸游客喜趨競匪獨杼柚
空富室歎交病市物盡昂貴窮巷亦瓶罄車騎喧閭閻寇
來正各慶澗水流潺湲日夜污吾聽欲往將安從苟全但
性命無情羨木石閱世忘衰盛

芟草

繞庭少蘭蕙徧地皆毒草觸手痛如螫其害實非小芟夷
先僕夫不暇避昏曉明知霜霰零此類盡枯槁芒刺奈眼
前勢延恐難掃去邪貴勿疑及茲未爲早雍氏想周官瑣

細亦王道託命空長鑣歎息身衰老

哀歌行

齒牙脫落鬢毛禿那怪逢人受侮辱憶昔東塗西抹時吐
氣亦復凌河嶽十年獻賦名未成退抱遺經守白屋妻子
飢寒救不得敢諉諸公壓梁肉遭逢患難誰我知躑躅江
頭自慟哭卻笑尋常里巷兒駟馬高車耀轉燭浮雲萬里
迷重霄燕雀何妨傲黃鵠故園三徑幸未荒歸期定許秋
風卜寄語紛紛諸少年莫更相疑費謠詠

宣德香爐歌

有明盛時數宣德海寓清晏民休息宮中聖人夜焚香曲
罷薰琴樂何極詔選良工製博鑪金精躍冶光騰壁夏鼎

殷彝並典重秦刀楚劍無顏色流傳已踰三百年寶貴人
閒徧南北閭城喪亂瓦礫空此物何人更珍惜我來斷鏃
尋戰場驚喜光芒市頭獲磨礪拂拭忘短宵俯仰古今忽
感激盛衰興廢本循環家尙有之何況國憶我趨庭總角
時曾見羅藏諸叔伯鬻錢易米今豈存聚散何堪一朝夕
舉頭四望猶烽煙撫此能弗淚沾臆

江口閒眺

江邊野岸自徘徊秋色行空滿目哀倦鳥有心辭病樹浮
雲何意掩高臺漫看壁壘連山轉誰見帆檣逐雨來舊恨
新愁流不盡西風林更夜潮催

題卽吾廬壁

豈真身似寄居處卽吾廬同想情如夢重來計本迂陂池
堪盡廢庭院亦全蕪對此羈孤極能無自短吁

造冊歎

田冊稽魚鱗遭亂悲散佚縣官詢主書下令徧蓬藁按畝
輸百錢丈量免耕輟似亦便民事民力奈已竭在昔元道
州賊退務矜卹表陳征斂苛不憚語激切豈今州縣長盡
由貨賄出刻剝素習聞仁慈那可說上苟廉潔持下自貪
污絕烽煙況未銷道路多白骨流亡歸何時富庶正無日
俯仰今古閒寸心自憂悵

重至金山

潤州問名勝自昔稱金山往來盛冠蓋古迹爭尋攀陷寇

積五載寸土皆腥羶先朝愷勿論俯仰康乾間崇閣額
行殿宸翰圖雕闌於時國饒富威震方百蠻六龍數
巡幸駐此開天顏深恩屢賜復父老懽迎鑾獻賦
紀功德濟濟朝紳班生晚未親覩閱世成艱難忝司此
邦鐸游覽時悲歎重來況今日滿目生荆菅拄杖欲何處
涕淚空潛潛同看大江水日夜流循環

題畫鷹

畫鷹昔推姜楚公飛動直與真鷹同縣之壁間百鳥懼遠
避不敢凌長空後來畫者失精巧豈是真鷹世已少未見
金眸玉爪材何由素練風霜掃嗚呼此畫知爲誰坐令凡
鳥生疑猜紙尾不肯署名氏紛紛讒忌防堪哀

獨坐

秋聲颯颯滿長空
獨坐蕭齋夜未中
無意高樓先得月
不
愁喬木易招風
道衰豈得名猶戀
身退何妨耳半聾
心事
千秋誰共證
壁閒留取一燈紅

留客

戀戀猶晨夕
吾廬豈果真
圓荷承蓋短
老桂作花新
衰病
悲青鏡
家書斷白蘋
時吟題壁句
留客定何因

廬州復陷

金陵未復王師老
廬州又陷何草草
京口傳聞了不驚
豈
是邊防備已早
紛紛日夕催捐輸
官廨神祠亟興造
肩摩
轂擊仍通衢
來往爭圖囊橐飽
江頭老翁還獨愁
放眼古

今自懷抱蠶蠶有毒害尙貽困獸猶鬪禍匪小詖詞邪說
況橫行鬼怨神恫悵自保念此能弗心怒然顧瞻靡騁免
如擣保障獨特張家軍所望妖氛迅除埽更施教化同人
心任卹睦嫻戶各曉庶幾耕鑿安堯天毋使閭閻重驚擾
欲歸未得耿不眠四壁蛩聲助悲悄

重修郡學五閱月而告成敬紀二十韻

荒城無片瓦宮殿此偏存天未斯文喪人猶至聖尊庀材
更節候糾匠集晨昏藻采騰新桷櫺星煥舊門鼓鐘銷殺
氣鼎鼐滌腥魂一代仍鴻業侏儒愧駿奔堪嗟塵劫過回
想列烽屯城郭驚雷陷樓臺動地淪暑寒經幾易禮樂歎
誰論豈久魚龍混旋聞虎豹吞重來看盛事再造荷元恩

自古兵戎革終先教化敦拊循如道德奠定自乾坤效法
兼羣哲淵源溯聖孫土階崇玉砌瓦缶薄金樽若佞歌輪
奭何由頌穆渾晴瀾同曲沼雲氣闕重闌枯柏無因覩殘
碑失共捫得教丹鳳降惟見石獅蹲門外石獅尚未全毀躑躅宮牆
外書時遞蕭溫

中秋夜月寄內

萬古圓闌月今宵兩地看金波徧浥浥銀漢失漫漫簾捲
香風散庭空冷露溥闌干休徧倚可但客邊寒

短歌

老馬能識途豈於伏櫪知明珠可照乘不在沈淵時君子
恥自獻甘爲羣小嗤

炎熱蠅蚋趨腥羶蜚蜚螳蟻營營利祿途豈復辨貴賤咄哉
長鬢奴驚寵亦顏面

權門勢喧赫自信手太阿一朝失顯要氣燄銷飛蛾不見
漢廷尉雀可門前羅

商販金紫滿奴隸車騎都軍興濫名器小子皆師儒官方
儻澄敘此曹將安圖

居安貴思危持盈在處盛擊柝聲猶聞彈冠衆已慶迂儒
獨心憂慙耳言誰聽

漢興治近古議禮尊儒生後世薄處士奔走由公卿我自
有好爵一笑得重輕

少微

少微光本玉繩齊歎息浮雲掩處低草木縱能區臭味鳳鸞底事誤枝栖心驚白浪潛虹影眼冷紅塵送馬蹏除是西川嚴節度何人解入浣花谿

彗星行

咸豐戊午建酉月降婁之次見星孛東南寇盜踰六年殺人日夜川流血幡然悔禍應彼蒼亟予櫬槍埽溟渤昨宵仰望西北隅朗朗一星先月出其光四散低虛檐髣髴前驅簪執末朝來萬口爭驚傳若恐妖氛復煽結我雖素昧天文占左史遺言尙能述布新除舊理或然乾象分明示凶吉所望朝廷教化施壹變澆漓樹豪傑毋使旄頭餓再騰致令弧矢威重奪太白蝕月兵禍終五星聚井蚩尤遏

小臣拭目觀中興紫氣常看護城闕

登高

登高望城市來往無一人但見土阜麓一牛卧重茵牧童
牽之起閒閒性胡馴西風忽以急涼意生白蘋參差蘘衣
袂墜葉驚繽紛曾是秋欲老尙爲客中身雲羅況滿眼避
弋知何因豈猶戀梁稻效彼雁呼羣行路近益難何處非
風塵茫茫一同想能弗悲酸辛

觀鬪蟋蟀

金籠玉柵有干戈歎息唐風休更歌爲問半閒堂上客近
來秋興欲如何

訓狐行

言才上言言不
君不見敗鼓之皮馬首蒙訓狐諂媚真虎同假竊餘威肆
吞噬獵犬側目潛無蹤空山野獸猛不懼舞爪磨牙怒相
遇草閒竄伏憐哀噪路黑宵昏欲何據君不見行雲施雨
昭含容尙有舊水藏蛟龍

小步

小步空庭失翠微蕭條景物已全非浮雲漠漠閒遮幔細
雨溟溟欲溼衣燕雀豈知鴻鵠志蜻蜓亦避伯勞飛何心
更著游山屐漸喜江頭可息機

偶述

憶年十四五侍親遊大梁經過幾都邑登眺興飛揚未知
鞍馬苦焉識道路長趨庭正極樂操翰成篇章習聞盡古

訓所見皆老蒼曾懷漸去遠志願羞尋常追歸逐朋輩聲
譽爭名場是時際全盛海寓多賢良便思奮鴻翼歛爾躋
鵷行許身敢妄擬結想非滄浪廿年意不得獻賦空明光
徘徊去京國鼓楫遊錢塘徧覽兩浙勝回泛新安航遂窮
皖江境得句盈奚囊人事雖迫促意氣猶激昂舟載競張
翰屣倒傾中郎悠悠盡陳迹役役悲非鄉自秉潤州鐸親
沒心久傷儒官世誰重藉盤愧徒將人事痛日變兵革興
倉皇長江古稱險飛渡竟莫當流血滿郊野填骨成邱岡
斯民陷水火已六經星霜亂極會當治豈遂蒼冥忘諒非
濟世才曷以同天網隆中感知遇漢業分興亡斯人不可
見徒令淚沾裳

驚聞六合失守已十餘日而未見軍報忽得溧水復陷之信書此以紀憂憤

德將軍走無江浦賊騎長驅勢莫阻六合孤城守獨堅可憐今亦成焦土消息傳來或未真齒寒無那先亡層沿江郡縣盡震動溧水復陷非無因朝廷命將十餘輩幾見臨危不身愛獨一張帥誓報國奔命誰能論成敗昨日江北今江南我勞彼逸嗟何堪白日黯黯慘行路黃沙莽莽飛寒潭悲我今猶歸未得日向空庭望北極安得旄頭一夕傾凱歌徧唱還鄉國

消息

消息傳來惡城真六合傾艱危經百戰號慟忽三更雞犬

悲同盡豺狼怒孰嬰可憐溫內史齋志竟捐生

從此江南北會無一席障淮徐都震動曹兗正倉皇

時東省亦

有捻寇

野哭聞千里蠻歌雜四方何人膺重寄避賊計偏長

廬浦行紀八九兩月事

廬州賊勢方猖狂突陷江浦趨儀揚德營遠避召伯埭致
使北面無人當六合孤城守六載可憐今亦如睢陽賀蘭
重兵自坐擁南八殉國誰同傷哭聲動地血成沼黑雲蔽
日天無光堪更旄頭照溧水瘡痍未復重倉皇大營猛士
雖無數奈隔江水疲相望鞭長誰能及馬腹援師忽報來
天長昔曾豫東埽狂孽威名久著驚豺狼知人善用洵人
傑魯從招垆皆成良一鼓盱眙報歸順賊膽欲落知難強

蘇常門戶恃東壩從容已得嚴周防不然歸計未漏息太湖風浪誰能量我方客途歎留滯訛傳能弔憂吾鄉所恐旋撫或旋叛殷鑒慎勿前明忘

李昭壽為賊中巨酋受撫於勝帥屢輸賊情奏賞三品銜改名世忠今復報賊扮商人暗投東壩欲襲蘇杭江南大營得以有備李遂獻滁州以降

江南諸將復溧水

復聞收溧水賊勢漸知窮直搆應乘勝長驅合有功一隅雖負固諸將自稱雄慎勿輕餘寇須防走險同

蟋蟀

驚心時序急蟋蟀爾胡聞猶未入牀下依然鳴戶閒豈憐羈客夢尙阻故鄉還唧唧終宵聽能無淚點潸

將歸里門留題潤州學舍兼示諸生

如此江山不可留依依欲去更回頭亦知久住原難別自
信無才合早休兩度遭兵悲世變一生講學誤身謀得歸
茅屋庸非幸松菊雖荒徑自幽

畫棟雕梁一夕傾淒清風月此荒城人稀未午先收市路
寂將昏已斷行過從往時餘幾輩艱難此日孰平生空桑
戀戀猶三宿廿載能無未了情

春風猶記我來初桃李花開徑未疏卧對遠山青落枕醉
臨流水綠承裾堂前喜布高賢席門外時停長者車轉盼
已多今昔感可堪重檢古人書

三絕由來說鄭虔笑人也竊廣文甄自知不學身宜賤休
恨憐才世少賢北望津門雲黯淡西瞻黔水雨連綿羣公

衮衮今誰託祇合歸耕郭外田

舊迹茫茫是處尋就衰腰腳怯登臨人空問字車聲斷客
少聽琴燭影沈風雨關心愁入夜星辰回首感非今昭明
石几知安在題墨何須問竹林

滔滔依舊送江潮誰共興亡話六朝賸有閒愁題草木更
無清興問金焦蠶蠶訴砌縈前夢魑魅吹燈暖短宵晦雨
瀟風堪一室自拈枯管寫無聊

壁閒麟鳳認依稀劫火偏留是也非興廢欲追千古恨浮
沈早悟一身微藝瓜待熟情何有種樹成陰願已違梁燕
亦知歸去好攜雛先我向南飛

江頭頻與問輕航十載歸心此竟償失喜親朋傾舊甕不

勞僮僕理行囊病蘇且幸烽煙遠夢穩何愁道路長到日
安排還債了底須更計隔年糧

有所悲

幻夢重尋一慨然地經兵燹斷人煙青山是處猶埋骨黃
土無端此委鈿魂儻能招應我戀淚空欲滴定誰憐傷心
不及真孃墓尙有新詩弔樂天

不雨

不雨過百日水涸土亦乾鄉農有憂色二麥種已難念從
兵戈起言之涕汎瀾拮据盡耕力成熟供賊餐官兵復踐
踏畝粒無有完今年羅防戍稍幸阡陌安八口豈便飽征
斂方急官如何日杲杲不放雲漫漫凶荒苟相繼可憂獨

飢寒沉聞川源竭舟楫膠河干往來阻行李躑躅生悲歎
私心亦戚戚亟望甘霖溥

籌防歎

善後勸捐苦不足籌防又報開官局日給薪水供委員窮
民那得邀餽粥腥羶所集羣螳趨獻諛貢媚紛馳驅黑旗
爭插號團練長官高坐心歡娛君不見前者儀揚閩告警
相對無言氣交屏誰見登陣有一夫徒令捐戶增悲嘆

雜詠

屢聞捷奏靖妖氛江北從今失陣雲零落西山幾長髮故
應閒殺德將軍

任他蠶蠹毒猶存此日終成釜底魂首逆生擒須努力莫

教容易失孫恩

合圍祇此一孤城走險還聞日夜驚差喜疆臣知大計不煩同紇助收京

嚴子秋招同周廉泉大令焦山看黃葉因病不赴酬以一詩

不到靈山已十年樓臺聞道尙依然虎谿一笑風塵辟焦山寺僧以危語卻去之獨得不毀龍壑千尋日月旋病起自愁陪上客重游況恐說離筵江流不返人將去黃葉丹楓總可憐

贈周海門濬川大令卽以誌別

世途日變遷迂儒衆所棄過問偶君子語真感欲涕自言有老親遇賊未知避性命雖幸保廬舍盡燬廢道梗歸省

難一官歎此繫近知阿翁來全家尙分寄我亦干戈閒脫
身夢常悸聞語那勿悲相訴及瑣細薄俗傷今時攘奪但
榮利骨肉罔知顧民命豈更計諒非至性人曷以救衰敝
待君家室迎瞻望慰兩地綰綬來吾鄉教化布愷悌庶幾
喪亂民益令慕仁義我歸守先廬亦得被蔭庇臨行贈此
詩雲樹渺天際

別劉伯純

患難始君識感君意頗眞往來五六載積久情彌親歎焉
別君去未免鼻酸辛念君嗜吟詠就我時諮詢今雖見難
數道隔非由旬寄書亦易達況乃銷風塵所嗟鮮暇日汲
汲各爲貧請看細人子轉盼皆朱輪君胡效康伯賣藥思

終身無求計原得榮辱誰同論我將從漁父往結江頭綸
相望兩自樂何必非天民

別嚴子秋

臨歧無那一沾巾患難交情本各真況是往來經卅載可
堪離別忽今晨江湖滿地書愁寄風雨深宵夢得親身老
時危慳會面天涯休道卽比鄰

贈孫穀堂

式榮

茂才卽以爲別

褊心從客誚倦眼忽君開磊落空懷古風塵少此才登樓
王粲感拔劍杜陵哀後日如相憶青山綠水隈

別楊子城

兩情苟不渝豈必在朝暮自我與君識非有酒食素會當

兵戎起奮袂偶道路誓欲肝膽傾憤切同仇訴不憚奔走
勞得致纓鉏赴擁纛彼何爲獻策慙弗顧徒效包胥哭空
負倉葛呼飲恨歸江頭忍飢自邱墓奈何悲憫心惓惓尙
如故博濟非易言德怨每交附我今別君歸願君厚愛護
尺書可時通休恨阻雲樹

偶檢癸丑年書牘存稿有爲余題詞者書以志感
年來事事不如人自恨蹉跎未乞身性懶逢迎容我拙分
甘寂寞欲誰親罪言杜牧狂同棄泣路楊朱感獨眞此日
題詞愁更讀一同低首一傷神

陽羨任益之

蘇軾

茂才投詩枉訪次韻奉酬卽以留

別

恩恩何幸接餘光曾是南豐有辦香謂路質軒彩筆忽傳悲宿
草微疴恨抱隔重牆等閒白水薦飛墮同笑春風蜚助忙
他日相望更相憶迢迢雲樹指千行

周子愉觀察枉訪留宿摘舊述懷感不能已作此奉

呈

寂處少人過病魔況初退胡忽車馬聲粼粼入門內驚喜
知公臨整冠亟起拜患難悲共經容顏看交頰昔來官府
迎今至隸役怪設館知何人暄淒付一慨感知我最深一
燈幸重對情事訴十年邯鄲淚承袂念當鬼夷逢全家痛
顛沛相依荷公仁出入從旌旆迂儒豈有知議事每稱快
竟忘名位微此遇知難再感激矢勿諉日月歎逾邁干戈

復此罹驚魂欲誰慰公時久去官倉皇亦寤寐消息兩莫
通蹤迹識安在連宵話無盡雨風忘淒晦世道日以非涼
薄起高位公尙白眼遭我窮更奚慙後會知何時徒令心
如醉

李兩人學士流寓如皋不得一別留此奉寄

行行首重回戀戀復何意崇岡蔽吾前延望渺天際念彼
東山人高卧起知未豈忘傾洞時黃埃正滿翳翛然了無
情終日門長閉相思空江頭寂寞自隕涕蘭蕙久不芳荆
棘繞階砌心期證未由暇卹世共棄候將雨雪零川少舟
楫濟寤寐紛離懷風詩感棠棣

歸舟寫懷

我生少安居習向扁舟託驚心江湖閒幾歷風波惡奈何
歸願償偏苦水乾涸結筏行不前岸高阻挽索跨驢過丹
陽始見一葦泊隔水亟相呼歡欣卸行橐推篷望青霄夕
陽正西落四面收漁罾炊煙起漠漠心閒路忘長所見皆
足樂計日到鄉閭便可尋鷗約從此許掩關不復插塵腳
誓將謝帆檣忍飢守藜藿

已未

人日邀同諸弟姪小飲

去年人日我方客今年人日我已歸今年得比去年好天
許行樂豈可違舊時親知歎久盡眼前弟姪堪招陪雖無
嘉肴足談笑儘可酣飲爐同圍兩耳不復聽官鼓半聾何

必防疑猜酒食雖微寓敦睦此事本自先人垂豪家宴客
備水陸林鳥列炬喧爭輝誰能爛醉不拘束轉轂傾覆吁
堪哀但願子孫識吾意安必醇俗真難追明年吾健定爲
例一笑席散顏微頹

風雨中李雨人學士見過欲留不得別後寄此
心事惓惓話短檐離情轉爲雨風添安危已信時難卜出
處能無意獨嚴戎馬關山悲杜甫綠波芳草恨江淹盈盈
一水勞相望休道垂綸夢已甜

回首

鎮日閉門坐身閒心自安惟應詩送老未解酒爲歡苦雨
少人過好花還獨看悠然今古意回首總漫漫

春興

枝頭好鳥聽階階歸及春風願未乖
飲水漫尋高士傳斷葷聊學太常齋
銷磨短劍腰虛看殘缺遺書手自排
出處從今休更論只煩料理踏青鞵

劉雲卿自軍中來訪翦燭話舊感贈一詩

人生惟一情相繫成今古自從風化衰
斯義委塵土念君別我去芒屨走軍府
蒿目皆瘡痍驚心但鉦鼓不惜肺腑
傾誰見口語忤徙己昌黎鯁嘯豈遠
公虎積誠感金石區區獨愚魯細訴
聽深宵奮袖爲君舞君來知何爲道路
忘辛苦我雖病免歸未便缺糾繡君
意偏惓惓欲語若難吐廿載京江遊
取友默心數如君有幾人一笑酒聊
酣慨然

想古賢雨雪剡江滸千里誠相思室遠豈自阻爲君誦唐
棧聖言庶可補

張小桂

達第

曹仰山

爾昌

先後相過

陋巷重煩二子探一居江北一江南漫疑閒道來何自但
訴離情已不堪徑早就荒誰爲埽盤無兼味我知慙旁人
還認揚雄宅道是門停問字驂

京口諸生多有以書相寄者屬又聞警作此慰問卽
以爲答

閉門足養疴懶復問塵事尙煩念衰庸閒月書一至近聞
江北軍一日舍三避相逼能無驚防禦欲誰議可堪禮樂
堂時作戎馬地我雖去茲土得免心憂悸慨然前史徵更

迭每興廢如何金陵戍七載痛相繼脂膏竭閭閻青紫耀
僕隸銷兵知無時厭亂自天意但得道路通亦自往來易
休怪作答疏涕淚那可寄

張師竹

邦

余舊友淵甫先生之子也淵甫沒官後貧

不能歸卽句容家焉丙戌夏遭賊害一家死者十
人師竹各繫以傳今來相訪出以示余哀之而爲
此詩卽送其歸容山

雨風聽不休愁慘少春意排闥知何人相見各隕涕君本
明德後聲譽未應替奈何喪亂遭風塵雜徒隸流寓容山
旁飢寒不自計賊來憤全家張目怒交臂天地正昏黑虎
狼得逃避婦女半投繯童穉亦被繫袖出紀事篇懷懷見

節義細讀我何堪朝餐爲君廢念與君先公漆膠比交誼
方深宿草悲又墮葛帔淚宗法論津津情事尙宛記此書
今知存痛定喜更繼盛衰豈偶然死生故非細君行欲何
之悵望干戈際

送兒懋之新安愀然成此

出門丈夫志常笑守家弄奈何兒有行惘惘偏臨送兒行
欲何之我謀已不用橐筆戎馬聞伐才更誰重念非逼飢
寒徒事歎倥偬新安路非遙江流瀉淙淙逆挽勞千夫有
若懸厓控道經子陵臺高風尙可諷舊游我未忘題壁正
冬仲冰雪催歸舟負米每增痛瞬息三十年追想真如夢
兒今復此遊念我心知共高會異清時雍容盛賓從不遇

卽早歸毋使誚愚戇莽莽看浮雲四郊正圯墮荒園可種
瓜且自學抱甕

採藥歌

手提藥籠向空谷參苓見慣何須蓄況肯牛溲馬勃收採
擇徒煩考別錄別有神農未見花淺白深黃看不足花開
恰是秋風時好借吳剛斧親斲謂勝瓊漿一口吞延年定
許童顏復豈知毒發無須與爛胃枯腸命旋覆誰能更起
狄梁公一問藥名是何屬

老農歎

我無半畝田所耕但一硯誰云歲無惡八口贍難徧不須
輸官倉豐盈復何羨念彼富千頃出納得自便槩戟森闥

閤車騎騁郊甸遑卹暮夜勞豈辦終朝宴未聞惟正供亟
亟小民先追呼祇蓬戶日夜涕流面老農抱深憂呼天昧
身賤我雖日不飽得免或天譴

家輪香見過

得歸休笑髮鬚髻往事重論感不勝木偶登場原是戲飢
人夢飽本難憑漫愁入市仍多虎豈信摩空竟少鷹聞道
憂時還有客好揩老眼看春燈

春睡

平安依舊少傳烽春睡何能許獨濃詩悔無題愁屬稿書
難作答怕開封好花帶雨都成淚飛絮兼風覺倍慵識得
老夫心事在細論還爲一扶筇

題織女圖

支機一片石猶閒幾度乘槎客已還爲道貫錢償不易未應天上勝人間

書全椒薛氏兩烈女事略後

女全椒人一名二珠年二十許字余氏一名四珠年十八許字吳氏父暄黍爲英山教諭從至英山戊午三月賊逼城下二女隨母避居黑李村九月六日賊掠村二女同躍入池以死其季父淮生

春藜

太史爲之徵詩

旌頭忽照英山城英山城中多哭聲可憐薛家兩好女不幸亦此同捐生一女字余一字吳全椒舊族人知名父擁皋比此流寓待年未嫁悲從行賊來待母避黑李里名本

惡心同驚未逾數月賊果至志已早決死非輕從容攜手
望池水波瀾不起成雙清全椒是我舊游地門高節義原
心傾今聞二女死烈烈得禁哀感曾交并我方追痛故人
子妹隨姊死誇全貞謂張淵甫二女何圖後先見此事能勿涕淚
爭沾纓作傳恨非職彤管題句亦愧書銘旌二女季父坐
史局正需濡筆傳蓬瀛

苦雨

雨聲浪浪聽不止支頭一甌冷如水朝來檐隙忽漏光亟
起開窗看失喜須臾障滿仍溼雲樹頭何處留微曛書黏
成片蠹不走衣黦若漬籌難熏我雖終日閉門坐道路不
復憂泥沍軍興已苦缺餼糧年荒堪更昂百貨豈其天意

欲洗兵故遣銀潢萬斛傾思之不得自長歎老農泣血知
無聲

悼張孟芳

振名

世衰士失已微言歎久絕嘯歌一室中堪復聲銷歇君來
我未歸我歸君已疾勉強造我廬往事感交述我雖一日
長君豈弟子列今況秉吳鐸觀化樂朽拙何乃盛虛懷進
退自抑抑涼薄方今時此風已前哲君今還太虛我尙縛
塵紕慨然念章縫苦節貞誰吉安得君長存佻蓬返城闕
哭君君不知雨風助嗚咽

和友感興

怱怱駒隙過如斯同首交游堪更思幾輩未忘田氏客當

年誰數蔡充兒亡羊得鹿都無據覆雨翻雲總可疑悟徹
莊生齊物意不將心事付彈棋

食楊梅

擔來紫白喜盈筐入口涎流勝玉漿豈是樹頭風味換今
年得在故園嘗

飽噉休嗤老更狂一生能得幾回嘗分甘弟妹知何在想
到兒時轉自傷

寄輪香

人生非別離何知重恩愛況茲各衰暮輾轉免寤寐念從
別君去風塵滿天外豈猶戀微名靡靡忘行邁留滯非無
因初願今始遂我去知君憂我歸定君慰譬如風中蓬飄

泊最無賴幸未隨飛灰銷沒有餘慨所恨隔城鄉雨風艱
良會款關知誰何我思固有在古人如可作夢尋路豈味
舊約願無負待君翦蔥薤

感時

陸沈誰共歎神州舉目河山恨未休莫更新亭問遺事過
江今已少名流

萬丈塵飛落日中出門何處不途窮誰能更取蒲葵扇徧
障東西南北風

不須障簾喚傾身喜怒公原別有因短簿髯參誰識得屋
烏水蟹兩非真

邵子顯以桃李見寄走筆爲謝

十年種樹已成陰
亂後誰能更一尋
料得故人相贈意
也應同我此時心
傾筐深感意
綢繆細寫難
忘舊日愁欲報
已知無一物
故將桃李一時投

周伯義爲解鐵如初度徵詩作此當賀

本是長庚合降庚
奚囊到處任閒行
不須更抱騷人怨
自向空山寫性情

筵前初度趁芳辰
裙屐聯翩笑語新
最好恰逢修禊日
風流都是永和人

詞賦何人許
並公本來遺
視有家風一經
自與傳高密
莫道今無鄭小同

回首圖山幾度經廿年蹤迹感蓬萍如何失卻霓裳曲不
共當年仔細聽

一庚申

喜潤孫游庠

一衿何足喜衰祚幸能支習俗非前日艱難況此時漫嫌
人所棄惟以古爲師願更修名勵毋忘危苦詞

張子畏觀察與余別三十三年矣春仲喜得重見有
詩見贈未及和而吳門又遭寇亂遷徙流離幾不
分萍蹤相聚今共僦居荒村補次原韻

不堪三十餘年別驚喜還留此兩翁放眼正愁天地窄同
頭早信死生空風翻林木千重黑火烈崑岡萬丈紅相對

新亭誰飲泣尙煩感慨付詩筒

子畏爲余題潤州論詩圖卽次原韻奉酬

杜陵際喪亂痛哭恆於詩惓惓寓忠愛不惜精神疲曠然
百世下誰則能悲之君少負奇氣談吐光陸離奈何用未
竟遽爾遭貶羈人亡邦國瘁古語原無疑吁嗟十年來驚
見幾喪師今更遇顛覆烈烈南風吹可憐好山水盡作亡
羊歧投足欲何所補救將安施逢君正倉猝招君姑江湄
哀哉報國心肯便尋安期炎炎崑岡火況乃日夜移昨聞
魏塘陷擊析聲聞茲豈真牛車客亦使靡有遺忠信苟各
矢獨免庸何奇不見三代下尙存古鼎彝焉必下釣墜不
可挽一絲所望君再起一反今所爲庶廢悲陳陶仍歌遊

漢陂感君贈我詩敢以此相貽

意若山館詩稿卷十六終

孫潤庠曾孫家振校字

先大父手定意若山館詩稿十六卷 先君子於就

養京師時曾躬自覆校其時

潤庠

適奉

命視學山左不果付梓今歲壬辰南齋僦直之暇始取而

刊之而 先君子於丙戌冬棄養不及見刊成

潤庠

校其字

兒子家振

亦與是役

先君子集中有鄭重

後昆圖繪在負書愧我願難酬之句注云余於避難

時凡先人著作皆背負以行曾欲倩友人作負書圖

亦未就且以力絀未能刊板心竊愧焉則

潤庠

之刊

斯集也所以成 先君子之志也

潤庠

五歲入塾至

成童皆稟承祖訓往往中夜篝燈親督之偶有一得

輒獎勵不去口回首兒時不禁捧硯而泣至 先大

父詩格直逼杜陵足爲一代大家當時諸名公羣相

推服小子何贅焉

孫開序謹跋